



Majlis Ugama Islam Singapura

Khutbah Jumaat

8 April 2016 / 30 Jamadilakhir 1437H

Merendah Diri Sebagai Peribadi Seorang Muslim

الْحَمْدُ لِلَّهِ الْغَنِيِّ الْحَمِيدِ وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَهُوَ عَلَى كُلِّ شَيْءٍ شَهِيدٌ، وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولَهُ الْمَبْعُوثُ بِالرَّحْمَةِ وَالْقَوْلِ السَّدِيدِ، اَللّٰهُمَّ صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلِّمْ وَسَلِّمْ تَسْلِيمًا كَثِيرًا. أَمَّا بَعْدُ، فَيَا عِبَادَ اللَّهِ اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ مُسْلِمُونَ.

Sidang Jumaat yang dirahmati Allah,

Marilah kita mempertingkatkan ketakwaan kepada Allah s.w.t. dengan setiap detik nafas kita, melalui percakapan, gerak laku serta budi pekerti kita. Jauhilah segala larangannya dengan segala kemampuan kita. Semoga kita tergolong di kalangan hamba-hambanya yang menerima maghfirahnya, Amin Ya Rabbal 'alamin.

Allah s.w.t. berfirman di dalam Surah al-Isra' ayat 37:

وَلَا تَمْشِ فِي الْأَرْضِ مَرَحًا إِنَّكَ لَنْ تَخْرِقَ الْأَرْضَ وَلَنْ تَبْلُغَ الْجِبَالَ
طُولًا



Yang bermaksud: *“Dan janganlah engkau berjalan di bumi dengan berlagak sombong, kerana sesungguhnya engkau tidak akan dapat menembusi bumi dan engkau tidak akan dapat menyamai setinggi gunung-ganang.”*

Sidang Jumaat yang mulia,

Khutbah minggu lalu telah mengajak kita mendalami nilai merendah diri dalam menuntut ilmu. Sifat rendah diri atau tawaduk ini ialah sifat mulia yang dipandang tinggi di sisi Allah s.w.t. Ia merupakan satu ciri dititikberatkan Al-Quran mahupun Sunnah Nabawiyah. Ini kerana sikap merendah diri merupakan kunci kepada pembersihan jiwa dan pemurnian akhlak, serta menjadi landasan kepada pemeliharaan hubungan yang baik dengan Allah s.w.t. dan sesama manusia. Ia mengingatkan manusia akan kehambaannya, akan kesaudaraannya, dan akan kebergantungannya kepada Al-Khaliq serta makhluk lain.

Saudara,

Tanpa kerendahan diri, kita akan dikuasai rasa ego dan sombong yang boleh mendatangkan bahaya kepada diri dan orang lain. Bahkan sikap merendah diri menjadi kunci untuk mengelakkan daripada permusuhan dan kezaliman sesama manusia. Ini kerana pertelagahan berpunca daripada sikap angkuh, dan sikap tidak menghormati kehormatan orang lain. Sikap merasakan diri sendiri sahaja yang benar dan mengatasi orang lain akan menyuburkan dan menyemarakkan

permusuhan. Kita lihat sahaja dalam kehidupan seharian kita, jika ada teman-teman yang sememangnya mempunyai sikap sombong yang amat mendalam, mereka tidak akan mahu menerima nasihat orang lain meskipun perbuatan dan perkataan mereka sememangnya adalah salah. Ini bukan sahaja boleh mendatangkan bahaya kepada diri mereka tetapi juga kepada orang lain. Contohnya, kita melihat bagaimana sudah berlaku kecederaan di tempat kerja disebabkan kesombongan sebahagian pekerja yang tidak mahu mengikuti langkah-langkah keselamatan yang telah ditentukan.

Saudara,

Ini hanyalah contoh kesan buruk secara fizikal apabila tiada sifat merendah diri. Namun kesombongan membawa bersamanya pelbagai kesan kerohanian yang amat tidak diingini dan bahkan boleh menyebabkan pelakunya tersungkur di pintu syurga. Contohnya orang yang masih sombong dengan Tuhannya dan enggan tunduk patuh melaksanakan kewajipan. Allah s.w.t telah kurniakan kepadanya nikmat kesihatan, harta, keluarga bahkan keamanan hidup. Namun dia masih tidak sudi mempersembahkan sujud syukurnya. Dia masih tidak lagi mahu berkongsi kelebihan hartanya meskipun membayar zakat setahun sekali. Bahkan lebih teruk lagi, bukan sahaja dia mengabaikan perintah Allah bahkan dia melanggar laranganNya dengan maksiat.

Saudara,

Mungkin ada di antara kita yang sudah lebih rajin beribadah akan mengangguk setuju mendengar kata-kata yang baru saya lafazkan. Namun nasihat yang sama juga saya sajikan buat diri saya dan mereka yang sudah pun dibukakan hatinya untuk lebih beragama. Janganlah anda juga merasa sombong dan bangga diri dengan keberagaman kita. Janganlah timbul dalam diri kita perasaan bahawa kita lebih baik daripada orang lain. Ini kerana seandainya syaitan tidak dapat menghalang kita daripada mentaati Allah, ia akan menipu kita dengan ketaatan kita kepada Allah. Bagaimana caranya? Antaranya adalah dengan menimbulkan rasa bangga diri dengan ketaatan kita.

Syaitan akan membuat kita merasakan kita lebih mulia daripada orang lain. Ini kemudian boleh mempengaruhi cara kita berinteraksi dengan manusia. Antara tanda sudah ada bibit-bibit kesombongan dalam diri kita adalah kita akan mula bertutur dengan nada suara dan bahasa merendahkan orang lain. Apabila kita melihat orang yang melakukan kesilapan dan dosa contohnya, kita bersikap keras, menghina bahkan memalukan mereka contohnya di media sosial dan sebagainya. Sedangkan kita juga pernah suatu ketika seperti mereka. Bahkan mungkin sahaja lebih teruk ataupun sebenarnya masih demikian hanya sahaja daripada luarannya nampak lebih beragama. Ingatlah akan ancaman junjungan kita Nabi Muhammad s.a.w.: *“Tidak akan masuk syurga seseorang yang*

di dalam hatinya terdapat kesombongan meskipun sebesar biji sawi.” Ada seseorang yang bertanya, “Bagaimana dengan seorang yang suka memakai baju dan sandal yang baik?” Rasulullah s.a.w. menjawab, “Sesungguhnya Allah itu indah dan menyukai keindahan. Kesombongan adalah menolak kebenaran dan merendahkan orang lain.” [Hadith riwayat Imam Muslim]

Semaklah diri dan hati kita semula saudara. Lihatlah cara kita berkelakuan sama ada dengan Allah mahupun manusia lain. Perhatikan kata-kata kita di media sosial. Mintalah nasihat dan penilaian jujur orang yang rapat dengan kita.

Saudara,

Perasaan rendah diri adalah kunci untuk kita disenangi bukan sahaja oleh manusia tetapi juga Allah s.w.t. Orang yang merendah diri akan lebih mudah diterima orang ramai dan dengan itu boleh membuka banyak peluang kebaikan. Dengan sikap tawaduk, ia akan membantu kita menjadi seorang pekerja yang lebih mudah menerima kritikan membina dan memperbaiki diri kita. Ia dapat menjadikan kita seorang pemimpin keluarga yang lebih disayangi anggotanya kerana kita akan lebih mudah memohon kemaafan apabila tersilap dan memperbaiki keadaan, tidak seperti orang yang sombong dan ego.

Mudah-mudahan dengan usaha kita merendahkan diri Allah s.w.t. akan meninggikan kedudukan kita. Semoga Allah mengurniakan kita kekuatan untuk mendidik dan memelihara kerendahan hati dan diri sehingga terbuka bagi kita pintu-pintu kebaikan di dunia dan akhirat kelak. Amin Ya Rabbal 'Alamin.

بَارِكْ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ
الآيَاتِ وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ إِنَّهُ هُوَ السَّمِيعُ
الْعَلِيمُ، أَقُولُ قَوْلِي هَذَا وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ
الْمُسْلِمِينَ وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ فَيَا
فَوْزَ الْمُسْتَغْفِرِينَ وَيَا نَجَاةَ التَّائِبِينَ.